



PEKELILING PESURUHJAYA PERLINDUNGAN DATA PERIBADI BILANGAN 3 TAHUN 2022

KEWAJIPAN UNTUK MEMPERBAHARUI PERAKUAN PENDAFTARAN SEBAGAI PENGGUNA DATA DI BAWAH AKTA PERLINDUNGAN DATA PERIBADI 2010 [AKTA 709]

1.0 TUJUAN

Pekeliling ini bertujuan memastikan permohonan pembaharuan Perakuan Pendaftaran sebagai Pengguna Data di bawah Akta Perlindungan Data Peribadi 2010 [Akta 709] dilakukan secara teratur dan berkesan selaras dengan keperluan Akta 709 serta peraturan-peraturan yang sedang berkuat kuasa.

2.0 LATAR BELAKANG

2.1 Seksyen 14 Akta 709 memperuntukkan bahawa Pengguna Data yang tergolong dalam mana-mana Golongan Pengguna Data yang dinyatakan dalam Perintah Perlindungan Data Peribadi (Golongan Pengguna Data) 2013 [P.U.(A) 336] dan Perintah Perlindungan Data Peribadi (Golongan Pengguna Data)(Pindaan) 2016 [P.U.(A) 326] hendaklah berdaftar di bawah Akta.

2.2 Pendaftaran sebagai Pengguna Data dibuat secara dalam talian melalui Sistem Perlindungan Data Peribadi (SPDP) di pautan <https://daftar.pdp.gov.my>.

2.3 Selepas pendaftaran diterima dan disertai dengan pembayaran fi yang ditetapkan, suatu Perakuan Pendaftaran akan dikeluarkan kepada Pengguna Data. Tempoh keesahan sesuatu Perakuan Pendaftaran adalah bermula dari tarikh bayaran diterima daripada Pengguna Data.

3.0 SYARAT-SYARAT PEMBAHARUAN PERAKUAN PENDAFTARAN

3.1 Di bawah subseksyen 17(1) Akta 709, sesuatu permohonan bagi Pembaharuan Perakuan Pendaftaran bagi Pengguna Data perlu dibuat sebelum tamat/luput tempoh Perakuan Pendaftaran dan disertai dengan pembayaran fi yang ditetapkan. Permohonan bagi Pembaharuan Perakuan Pendaftaran boleh dibuat tidak lewat daripada sembilan puluh (90) hari sebelum tarikh tamat/luput tempoh Perakuan Pendaftaran.

3.2 Walau bagaimanapun, Pengguna Data boleh memohon bagi suatu Pembaharuan Perakuan Pendaftaran pada bila-bila masa sebelum tarikh tamat/luput tempoh Perakuan Pendaftaran. Permohonan bagi Pembaharuan Perakuan Pendaftaran tidak akan dibenarkan selepas tarikh tamat/luput tempoh Perakuan Pendaftaran dan tidak boleh diperbaharui. Pengguna Data perlu mendaftar semula sebagai Pengguna Data.

3.3 Setiap permohonan Pembaharuan Perakuan Pendaftaran boleh dibuat untuk tempoh satu (1) sehingga sepuluh (10) tahun.

3.4 Pengguna Data boleh membuat permohonan bagi Pembaharuan Perakuan Pendaftaran secara dalam talian di pautan <https://daftar.pdp.gov.my>.

4.0 FI PEMBAHARUAN PERAKUAN PENDAFTARAN

Fi Pembaharuan Perakuan Pendaftaran sebagai Pengguna Data adalah seperti berikut:

BIL	PENUBUHAN PENGGUNA DATA	FI PEMBAHARUAN / SETAHUN
1.	Pemilikan Tunggal	RM100.00
2.	Perkongsian	RM200.00
3.	Syarikat Sendirian Berhad	RM300.00
4.	Syarikat Awam Berhad	RM400.00

5.0 NOTIS PEMBAHARUAN PERAKUAN PENDAFTARAN

5.1 Notis Peringatan Pembaharuan Perakuan Pendaftaran akan dihantar melalui e-mel secara automatik ke alamat e-mel berdaftar Pengguna Data untuk memperbaharui Perakuan Pendaftaran seperti berikut:

- i. Sembilan puluh (90) hari sebelum tarikh tamat/luput tempoh Perakuan Pendaftaran;
- ii. Enam puluh (60) hari sebelum tarikh tamat/luput tempoh Perakuan Pendaftaran; dan
- iii. Tiga puluh (30) hari sebelum tarikh tamat/luput tempoh Perakuan Pendaftaran.

5.2 Notis Pembaharuan Perakuan Pendaftaran di bawah subseksyen 17(1) Akta 709 akan turut dikeluarkan secara bertulis kepada Pengguna Data untuk membuat pembaharuan Perakuan Pendaftaran dalam tempoh enam puluh (60) hari sebelum tarikh tamat/luput tempoh Perakuan Pendaftaran secara –

- i. menghantar serah notis kepada Pengguna Data;
- ii. meninggalkan notis di alamat kediaman atau tempat perniagaan Pengguna Data yang terakhir diketahui dalam suatu sampul yang ditujukan kepada Pengguna Data; atau
- iii. menghantarkan notis melalui pos dalam suatu surat berdaftar Akuan Terima yang ditujukan kepada Pengguna Data di alamat kediamannya atau tempat peniagaannya yang terakhir diketahui.

6.0 KEGAGALAN MEMPERBAHARUI PERAKUAN PENDAFTARAN

- 6.1 Pengguna Data yang tidak memperbaharui Perakuan Pendaftaran dan terus memproses data peribadi selepas tarikh tamat/luput tempoh Perakuan Pendaftaran adalah melakukan suatu kesalahan di bawah subperaturan 5(2) Peraturan-Peraturan Perlindungan Data Peribadi (Pendaftaran Pengguna Data) 2013 [*P.U.(A) 337*] dan boleh, apabila disabitkan, didenda tidak melebihi RM250,000.00 atau dipenjarakan selama tempoh tidak melebihi dua (2) tahun atau kedua-duanya.
- 6.2 Pengguna Data yang tidak memperbaharui Perakuan Pendaftaran setelah tarikh tamat/luput tempoh Perakuan Pendaftaran akan dikenakan tindakan kompaun atau tindakan mahkamah.

7.0 PEMBATALAN

Dengan berkuat kuasanya Pekeliling ini, maka Pekeliling Pesuruhjaya Perlindungan Data Peribadi Bil. 2 Tahun 2022 adalah **dibatalkan**.

8.0 KUAT KUASA

Pekeliling ini berkuat kuasa pada tarikh ia ditandatangani.

9.0 PEMAKAIAN

Pekeliling ini adalah terpakai kepada Golongan Pengguna Data yang dinyatakan dalam Perintah Perlindungan Data Peribadi (Golongan Pengguna Data) 2013 [P.U.(A) 336] dan Perintah Perlindungan Data Peribadi (Golongan Pengguna Data)(Pindaan) 2016 [P.U.(A) 326].

Sekian, terima kasih.

“WAWASAN KEMAKMURAN BERSAMA 2030”

“BERKHIDMAT UNTUK NEGARA”

Saya yang menjalankan amanah,



(MAZMALEK BIN MOHAMAD)

Pesuruhjaya

Perlindungan Data Peribadi

Tarikh: 23 Februari 2022